

उपराज्यपाल मनोज सिन्हा हो'रें जम्मू लोक भवन च कैलख ज्योतिष ते वैदिक संस्थान ट्रस्ट दी सलाना पत्रिका “कर्तव्य मार्ग” दे चौथे संस्करण दा विमोचन कीता। इस मौके पर किट्ठै गी सम्बोधित करदे होई उपराज्यपाल होरें आखेया जे साहड़ी प्राचीन ज्ञान प्रणाली ते अंदरुनी ज्ञान- कामयाब आधुनिक दुनिया लेई इक खाका पेश करदा ऐ। उ'नें आखेया जे भारत दी प्राचीन ज्ञान प्रणाली समकालीन चुनौतियें दा हल पेश करदी ऐ ते वेद ते उपनिषद जनेह प्राचीन ग्रंथ ज्ञान दा खजाना न। उपराज्यपाल हो'रें वैदिक विज्ञान- लोक

संस्कृति ते सांस्कृतिक मुल्लें गी बढावा देने लेई ट्रस्ट दी सराहना कीती ते नौजआनें गी भारत दी विरासत कन्नै जुड़ने लेई प्रोत्साहित कीता।

<><><><><><>

## CM-CR Patil

मुख्यमंत्री उमर अब्दुल्ला हो'रें कल नमीं दिल्ली च केन्द्री जलशक्ति मंत्री सी.आर. पाटिल हुंदे नै मलाटी दौरान जम्मू-कश्मीर च “जल-जीवन” मिशन दी अमलावरी सरबन्धि केई सारे मुद्दें पर गल्लबात कीती- जिंदे च नमें सिरेया शुरू कीती गेदियें स्कीमें गी तोड़ चाढ़ने- जिंदे चा मती सारियां तोड़ चढ़ने दे कोलकाल न- दे इलावा “जल-जीवन” मिशन सनें मुकम्मल होई चुके दे होरनें कम्में लेई केन्द्री फंड जारी करने दा मुद्दा बी शामिल रेहा। मुख्यमंत्री होरें उनें'गी जकीन दोआया जे जम्मू-कश्मीर सरकार कम्में गी समें-सिर तोड़ चढ़ाना जकीनी बनाग ते जल जीवन मिशन दे लक्षें गी हासल करने लेई कम्में पर नेइमी तक्क रखोग। मुख्यमंत्री होरें केन्द्र सरकार आसेया दिती जा'रदी सहायता ते समर्थन कन्नै जम्मू-कश्मीर दे ग्रामीण इलाकें च “हर घर जल” दे लक्ष गी तौले हासल करने दे केन्द्र शासत प्रदेश सरकार दे धेइए गी फही पक्का कीता। मुख्यमंत्री हुंदे कन्नै जलशक्ति मंत्री जावेद राणा होर बी गेदे हे।

<><><><><><>

## **Rustam-e-JK**

जम्मू-कश्मीर दे ऐतिहासिक मौलाना अज़ाद स्टेडियम च अज्ज अपनी किस्मै दा पैहला-पैहला कुश्ती दा आयोजन कीता जा'रदा ऐ- जेहदे च पैहला अंतराष्ट्रीय दंगल ते "रुस्तमे-जम्मू-कश्मीर-2025" लेई मुकाबले शामिल न। इस बड़दे आयोजन च 100 कोला मते राष्ट्रीय ते अंतराष्ट्रीय सतह दे पलोआन हिस्सा लै'रदे न- जेहड़े "रुस्तमे- जम्मू-कश्मीर-2025" दा खताब जितने लेई अपना पूरा दमखम लाने लेई तयार न। एह आयोजन पैहले 17 दिसम्बर गी होना हा- पर टाले लेई जाई सकने आहले हालात दे चलदे इसी अज्ज शुरू करोआया गया। इस पैहले-पैहले कुश्ती आयोजन यानि पैहले अंतराष्ट्रीय दंगल ते "रुस्तमे-जम्मू-कश्मीर -2025" दा उदघाटन अज्ज खेड्ड मंत्री सतीश शर्मा होरें कीता।



## **Kishtwar Search Op**

किश्तवाड़ जिले दे सिंहपुरा इलाके च संदिग्ध गतिविधि बारे खूफ़या जानकारी थहोने मगरा भारतीय फौज नै इस इलाके च बड़दे पैमाने पर तुपाई अभियान रम्भेया ऐ। पूरे इलाके दी घेराबंदी करी दिती गई ऐ कुसै बी बड़डी घटना गी रोकने लेई लगातार तपाश जारी ऐ।



## **Jammu Smart City Award**

जम्मू स्मार्ट सिटी लिमिटेड नै नमीं दिल्ली च आयोजित पी.एस.यू ट्रांसफॉर्मेशन अवार्ड - 2025 च त्रै राष्ट्रीय सम्मान हासल कीते न। सार्वजनिक क्षेत्रें दे उपक्रमें आसेया समाज च

बदलाव ते सुधार आहन्ने सरबंधि इनें अवार्डें च जम्मू स्मार्ट सिटी लिमिटेड गी तवि रिवर फ्रंट विकास च हासल उपलब्धियें- शैहरी गतिशीलता ते कुदरत दे अनुकूल हरित सार्वजनिक ढांचागत सरबंधि पैहलकदमियें लेई एह सम्मान दिते गे न। इस मानता कन्नै इस गल्लै दी तस्दीक हुंदी ऐ जे जम्मू-कश्मीर दी टिकाऊ शैहरी विकास- आम लोकें दे हितें पर केन्द्रित योजनाएं- पर्यावरण दे संरक्षण गी ध्यानै च रखदे होई विकास कम्में गी तोढ़ चाढ़ने ते आधुनिक सार्वजनिक ढांचा उपलब्ध कराने गी लेइयें- वचनबद्धता किन्नी मजबूत ऐ। एहदे कन्नो-कन्नी इस उपलब्धि कन्नै जम्मू-कश्मीर च शुमार हून देसै दे बेहतरीन कारकरदगी दस्सने आहले स्मार्ट सिटी शैहरें च होआकरदी ऐ।

<><><><><><>

### Oral-Polio Vaccine

राष्ट्रीय टीकाकरण दिसव 2025 तैहत पल्स-पोलियो अभियान जम्मू-कश्मीर च 21 दिसम्बर थमां शुरु होग। इस दौरान 5 बरे तगर दी उमरी दे 19 लक्ख थवां बद्ध बच्चें गी पोलियो दियां बूँदा पलाइयां जागंन। घर-घर जाइयै 22 ते 23 दिसम्बर गी ए बूँदा पलाइयां जागंन तां जे कोई बी बच्चा खुंजी नैई जा। अधिकारियें दस्सेया ऐ जे एहदे लेई 10 जहार 993 बूथ कायम कीते गे न ते 518 गश्ती दल बी लाए गे न। मीडिया राहें बी इस बारे जागरुकता फैलाई गई ऐ- तां जे जम्मू-कश्मीर गी पोलियो मुक्त रखेया जा।

<><><><><><>

## Weather

जम्मू शैहर ते एहदे आहले-दोआले दे इलाके च कल शामी आंगर गै अज्ज बड्डलै बी घनी धुंध कारण आम जनजीवन टकोहदा करियै गड्डियें दे चलने च दिक्कत आवा'रदी ऐ- जिसलै जे पूरे जम्मू प्रांतै च सुक्की ठंडू दा प्रकोप बरोबर जारी ऐ। धुंध दे चलदे किश फुट दे छिंडे पर दिक्खना मुश्कल होआ'रदा ऐ। उआं मौसम विभाग आसेया दिती गेदी जानकारी मताबक अज्ज शामी'लै किश थाहरें हलकी बरखा बरने दे बी आसार बने दे न- जेहदे नै लोकें गी सुक्की ठंडू ते धुंध थमां राहत थोने दी मेद कीती जा'रदी ऐ।

<><><><><><>